



齊家寶要  
上末

9
3775
2



口 9  
3775  
2

家規

武林何公士明著公嘉隆間錄

孝親敬長之規

一孝順父母尊敬長上乃百行之首

相之親戚鄰里重之凡有父母兄長在前者不可  
不及時勉旃○一今之人以能養為孝者何蓋緣  
不顧父母而私妻子剛行逆施者衆彼善於此故  
與之耳殊不知孝之道豈養之一事所能盡哉要  
有深愛婉容而承顏順志尊敬謹畏而惟命是從  
稍有斯須欺慢違忤或傷教敗禮取辱貽憂雖日  
用三牲之養猶為不孝也藍田呂氏曰孝莫大乎  
順親司馬公曰吾事親無以踰於人能不欺而已  
矣其事君亦然○一人家子弟有父母兄長慈愛  
又得教以詩書授以生業而能顯親揚名以盡孝  
敬之道者乃常分耳烏足言要在困苦艱難流離  
顛沛之際竭力盡心周全委曲消患弭變特立獨  
行而不失其度者方為孝敬

齊家寶要

卷上家規

三

嘉慶十四年  
正月十五日

十七日  
正月十五日

隆師親友之規

一凡家素清約自奉宜薄然待師友則不當薄也切不可因已無成而不教子又不可以家事置之而不從師務要益加勉勵則所聞者堯舜周孔之道所見者忠信敬讓之行漸摩既久身日進於仁義而不自知也若為利欲所使違棄師友則與不善人處所聞所見無非欺誣詐偽汗漫邪淫之事身日陷於刑戮而亦不自知也言之痛心各宜自省○一君子以文會友以友輔仁必須趨向正當切磋琢磨有益於已者始可且相親與若乃邪僻卑劣與夫柔佞不情相肩執袂相誘為非者慎勿與之交接○一學問之功與賢於已者處常自以為不足則日益與不如已者處常自以為有餘則日損故取友不可以不謹也惟謙虛者能得之

待人接物之規

一凡與賓客及尊長卑幼君子小人相接儀節固有不同咸不外乎敬而已矣若待尊長必須言溫而貌恭情親而意洽尊長或不我愛益加敬謹可也待卑幼又在自敬其

身苟能尊嚴正大肅矩整規則為卑幼者修飾畏懼之不服孰得而上犯之耶一或瑣碎褻狎便無忌憚矣待君子之敬根於心百凡相見往來交際之禮俱宜從厚其敬始伸稍薄則為慢矣待小人則不然外若敬而內則疎包容退讓寧受虧一分使之自滿自愧於我亦無所損若與之爭競較量一旦棄絕或發其陰私斥其過惡彼必終身懷忿不至中傷而不止耳此乃一生所驗之良方以為後人應世之藥石○一凡客至家長或宗子出迎若係宗族姻黨之尊者子弟俱出列班肅揖如出死遠回久不相見者則拜或留飯家長宗子奉陪如係子弟中之舊師友新姻眷止是此子弟同陪其餘不必見也留飯之意既得盡話又得盡歡且能盡敬凡路遙者不使受飯而還飯貴快便精潔不貴多品庶親近教益常可往來若一豐厚後來難繼也

鞠育教養之規

一古有胎教凡婦人妊子寢不側坐不邊立不踣不食邪味割不正不食

帝不正不坐。目不視邪色。耳不聽淫聲。此道也。今之婦人。鳥得而知之。夫當預與之言。○一凡產子。須是為母者自哺。不可委之乳母。吾嘗見人家用乳母者。僱直服食。稍不如願。反令其子寒煖失時。饑飽無節。或跌撲驚傷。隱蔽不言。致疾莫知。所自且乳母中。端潔者寡。常生意外之虞。不可不謹。○一子女初生。三朝滿月。慎勿置酒。張筵。多害生命。惟齋沐更衣。具酒果。抱子告於祠堂。其世俗催生送羹之禮。糜費無益。槩宜謝絕。○一古禮。名子不以日月。不以國。不以隱疾。不以山川。亦不可與古先聖賢同名。但只名以理學之字。使之顧名思義。可也。○外有數則。太意與溫公家儀同。

讀書寫字之規

氣質亦不必觀其才華。先要觀其敬與不敬。則一生之事業。槩可見矣。凡開蒙之後。能漸漸收斂。一惟師教之是從。親言之是聽。敬重經書。愛惜紙筆。潔淨几案。整肅身心。開卷如親對聖賢。熟讀精思。沉潛玩索。將書中義理。反來就自家

身上體認。眠存夢繹。念念不忘。如嬰兒之戀慈母。饑渴之慕飲食。無一刻之敢離。無一時之或怠。但遇緊要辭語。留意佩服。即思此一句。可以用在某處。我當謹守力行。此一句。正中我之病根。我當即為拔去。不使蔓延滋長。如此為學。雖愚必明。縱不能盡忠於朝廷。亦可以盡孝於父母。縱不能建功業於天下。亦可以自善乎一身。若乃不莊不敬。鹵莽忽略。未學先能。未講先厭。或講讀之際。且視他所手弄他物。心想他事。於書讀其前。則汗其後。讀其後。則毀其前。或自恃聰明。不肯用力。或專務外馳。不肯內究。如此為學。白首無成。雖成必敗。居官則壞國家之事。處己則無保身之謀。所以古之聖賢教人。先在灑掃應對。特著力。引誘提撕。倦倦以持敬為本。○一讀書。以百遍為度。務要反復熟嚼。方使味出。使其言皆若出於吾之口。使其意皆若出於吾之心。融會貫通。然後為得。如未精熟。再加百遍。可也。仍要時時溫習。若功夫未到。先自背誦含糊強記。終是認字不真。見理不透。徒做精神無

益學問。○一學問之功全在講貫而講書之要必須講後自己細看著意研窮潛思默究逐句細繹逐章理會方纔得其旨趣略有疑惑即為質問不可草草揭過俟一本通貫後仍聽先生摘其難者而挑問之或不能答即又思之思之不通然後復講真境一開如得時雨之化後來作文隨意運用信手發揮自然成章再無牽礙若泛泛而講之泛而聽原不留心佩記徒費唇舌不入肺腑今日講過明日忘之此章未達又講別章今年未明復待來歲雖講至百年成何益也。○一凡寫字務要莊重端楷有骨格有鋒鉞有稜角不得潦草歪斜微眇軟弱古人云用筆在心心正則筆正矣吾以為用筆固在心正又在手活手活則筆勢奇妙如走龍蛇不則若膠柱鼓瑟而別畫不開也是以小兒初學字時先要教其執筆圓活如寫小字止令手指運筆而手腕不可動也若小時失教太來難轉者令學草書庶幾可改抄書認字真切則無魯魚亥豕之弊既要求快捷又要不差此乃日用常行第

一急切之務况考試之日苟或字之不佳塗註蠹拙總是錦繡文章亦不動觀覽矣豈可謂字不緊要而不習也。○一功名富貴固自讀書中來然必待天與之方可得豈人力之所能為苟人力可為官將布滿宇內矣吾嘗見人家子弟不讀書則已一讀書就以功名富貴為急百計營求無所不至求之愈急其事愈壞緣此而辱身破家者多矣至於自己性分內有所當求者反不能求惜哉吾人各要揣己力量以安義命不得越理妄求今後可讀書者曉曉夜檠優游涵養以俟乎天將功名富貴四字置諸度外另將孝弟忠信四字時時存省苟能表帥鄉閭教導子姪有禮有恩上下和睦使強者不敢肆弱者得以伸只此就是治道何必入仕然後謂之能行不能讀書者安心生理顧管家事能幫給束修薪水之資使讀書者得以專心向學倘或成就得一箇好人不惟於合族有光亦不負父母之心只此就是孝義何必讀書然後謂之能知

出處進退之規

人生天地間。智愚賢不肖。固有不齊。或出或處。或進或退。要當皆以古人為鑑。斯無咎矣。昔伊尹傅說呂望孔明之處也。一耕於有莘之野。一備於版築之間。一垂釣渭濱。一高臥南陽。此四公者。不出則寥寥無聞。一出則立業建功。以安天下。向非天子夢卜。求而用之。終於農工漁隱之事。為甲鄙而不為也。今人知出而不農。工漁隱之事。為甲鄙而不為也。今人知出而不知處。知進而不知退。凡讀書不遂。即鄙農工商賈之事。而不屑為。所以有濟世之才。而無資生之策者多矣。如張齊賢以布衣。而條當世之務。藝祖留之。以相。太宗范仲淹以秀才。而懷天下之憂。君子稱之。為分內事。今初學之事。就欲妄事希覬干求。豈二公之儔耶。又留侯疏廣。功成身退。知止知足。成萬世之美名。今之既明且哲。以保其身者。幾人。吾人能知此四事。於所行所止之間。審己量時。見幾而作。則庶乎免夫失身之患。

節義勤儉之規

節義。一節義之人。乃天地正氣所鍾。光祖伐義而窮。婦人守節而苦。不能自存者。豈可不為之慮。而使之失所耶。合族俱當義處。資給以成其美。不得輕慢。斯當。一勤儉。為成家之本。男婦各有所司。男子要。以治生為急。於農商工賈之間。務執一業。精其器具。薄其利心。為長久之計。日逐所用。亦宜節省。量入為出。以適其宜。慎勿侈靡。驕奢博奕。飲酒宴安。懶惰若人。心一懶。百骸俱怠。日就荒淫。而萬事廢矣。婦女夙興夜寐。黽勉同心。執麻泉治。絲繭織組。組紉。以供衣服。不事浮華。惟其雅潔。凡有重務。弟兄妯娌。分任其勞。主婦日。至廚房料理簡點。但有僮婢。撒滌五穀。穢汙作踐。暴殄天物者。量加懲戒。至晚。扇鎖門戶。貯水。徙薪。逐處照管。仍諭各房。不許烘焙衣物。內外謹嚴。俱無怠忽。其上下衣食。分給有等。男女多者。傳述。惟均。不得各分彼此。嫁娶資粧。亦從簡便。如此。則衣食常盈。而先業不墜矣。

飲食服御之規

一飲食服御乃民生日用之不可缺  
 窮多由於此豈草茅之說所能挽回故歷采古先  
 聖賢之言為此標準吾人當佩服以成恬澹朴雅  
 之風○一古人飲食每種各出少許置之豆間之  
 地以祭先代始為飲食之人不忘本也○一為人  
 子者父母存冠衣不純素孤子當室冠衣不純采  
 ○一唐太宗教太子曰汝知稼穡之艱難則常有  
 斯飯矣○一朱子問曰飲食之間孰為天理孰為  
 人欲曰飲食者天理也要求美味人欲也○一君  
 子慎言語節飲食二者養德養身之切務○一有  
 道之士麤裘索帶而人不鄙之者取其內而不取  
 其外也○一司馬溫公曰吾平生衣取蔽寒食取  
 充腹亦不敢服垢敝以矯俗干名但順吾性而已  
 矣又曰吾家待客會數而禮勤物薄而情厚○一  
 古人事親有以酒肉養志者有以菽水承歡者均  
 不失為太孝○一茅容待客以草蔬與之同飯殺  
 雞為饌以供母客知之起拜而稱賢○一范文正

公雖貴非賓客不重肉妻子衣食僅能自充而惟  
 好施予晏平仲敝車羸馬而惠及三族○一范益  
 謙曰凡喫飲食不可揀擇去取○一汪信民曰人  
 常咬得菜根則百事可做朱子曰今人不能咬菜  
 根而至於違其本心者衆矣可不戒哉○一張文  
 節公為宰相自奉甚約或譏之公嘆曰吾今日之  
 俸雖舉家錦衣玉食何患不能顧人之常情由儉  
 入奢易由奢入儉難吾今日之俸豈能常有身豈  
 能常存一旦異於今日家人習奢已久不能頓儉  
 必至失所豈若吾居位去位身存身亡如一日乎  
 ○一柳公綽凡遇饑歲諸子皆蔬食學業未成者  
 不聽食肉弟見兄未嘗不束帶夫人常衣絹素不  
 用綾羅錦繡每歸親不乘金碧輿祇乘竹兜子常  
 命粉苦參黃連能膽和為丸賜諸子每承夜習學  
 舍之以資勤苦所以在公卿間最名有家法○一  
 君子以禮義養心則心廣體胖若恣食肥甘則神  
 昏氣潰婦女以布衣禦寒則堅苦  
 其志以香熏羅綺則浮蕩其心

量度權衡之規

一、人家之斗尺等秤，皆所以量多少，固外物耳。其實繫乎人之一心。心正而公，則制之惟準；用之惟平，使貿易輸歛之間，兩無虧累，即為天理矣。若以私刻存心，專圖利己，買人之物，則用小等大秤賣物，與人則用小秤大等，或借入米穀，原以太斗量入，而以小斗償還，取息於人，則以小斗放出，而以大斗收回，即此就為入欲，殊不知輕重大小之間，所增幾何，而所損大矣。蓋幽暗之中，鬼神在焉，人可欺而心不可欺，心可欺而天不可欺。吾人為學，欲辨理欲，而不可克己，工夫者，先從此處用力，最為親切。

撐持門戶之規

一、大丈夫尚欲戮力王室，而自家門戶，豈可不為撐持？而忍坐視其散乎？蓋人家之興者，豈得常興，而廢者亦豈常廢，興而不撐持，即廢矣。廢而能撐持，何患不興乎？興廢固由於天，而撐持之力，實在於人。人能知得此意，克勤克儉，凡有廢墜，一一修舉，或遇戶役世務之來，

宗子總其大綱，支庶同心共濟，協力幫扶，以保宗祀，切不可推延畏縮，竊議旁觀，以致唇亡齒寒，委靡不振，而反取人欺笑，雖然此其大畧也。若夫光顯之則，在經與書矣。

保守身家之規

一、保守身家之道，無他焉。第一不可藥燒丹，攘竊誣騙。第五不可強橫健訟，鬪狠逞兇，及打幫教唆，生事害人。第六不可交接無藉之徒，花叢遊蕩，不務本等生理。及縱容尼姑賣娣於內室，往來第七不可傲人慢物，好勝誇能，逆理亂倫，驕奢淫佚。第八不可為貪心所使，專行峻險之途，吾人能依得此誠，每日戰戰兢兢，循規蹈矩而行，則上不玷祖宗，辱父母，下不累妻子，害親鄰，明無人非，幽無鬼責，一家安樂，為何如哉。





族類當辨

族類當辨。類族辨物。聖賢不廢。世以門第相高。間有外邑移居本村。或繼同姓。子為嗣。其類匪一。然姓雖同。而祠不同。入墓不同。祭是非難淆。疑似當辨。儻稱謂亦從。叔姪兄弟。後世若之何。故譜內必嚴為之防。蓋神不歆非類。處已處人之道。當如是也。名分當正。非族者辨之。衆人所易知。易能也。同族者。輒近世風俗澆漓。或狎於褻昵。或狃於阿承。皆非禮也。至於拜揖必恭。言語必遜。坐次必依先後。不論近族遠族。俱照叔姪序列。情實親洽。心更相安。名門故家之禮。原是如此。又有尊庶母為嫡。躋妾為妻者。大乖綱常。反蒙詬笑。又女子已嫁而歸。輒居客位。是何禮數。吉水羅念菴先生宅于歸寧。女仍依世次。別設一席。可法也。若同族義男。亦必有約束。不得凌犯。疎房長上。有失族誼。且寓防微杜漸之意。

宗族當睦

宗族當睦。書曰。以親九族。詩曰。本支百世。睦族聖王。且爾。凡衆人乎。觀於萬石君家。子孫醇謹。過里必下車。此風猶有存者。未俗或以富貴驕。或以智力抗。或以頑潑欺。凌雖能爭勝。丁時已皆自作罪孽。况相角相仇。循環不輟。人厭之。天惡之。未有不敗者。何苦如此。嘗謂睦族之要有三。曰尊。尊曰老。老曰賢。賢名分屬。尊者尊也。則恭順退遜。不敢觸犯。分屬雖卑。而齒邁衆老也。則扶持保護。事以高年之禮。有德行族彥。賢也。賢者乃本宗。楨幹則親炙之。景仰之。每事效法。忘分忘年。以敬之。此之謂三要。又有四務。曰矜幼弱。曰恤孤寡。曰周窘急。曰解忿競。幼者稚年。弱者鮮勢。人所易欺。則矜之。一有矜憫之心。自隨處為之。效九矣。鰥寡孤獨。王政所先。况乎同族。得於耳聞目擊者乎。則恤之。貧者恤以善言。富者恤以財穀。皆陰德也。衣食窘急。生計無聊。命運亦乖。則周之。量已量彼。可為則為。不必望其報。不必使人知。吾盡吾心焉。人有忿則爭競。得一人勸之。氣遂平。遇一人助之。氣

齊文堂

卷上宗規

是

愈激。然當局而迷者多矣。居間解之。族人之責也。亦積善之一事也。此之謂四務。引伸觸類。為義田。義倉。為義學。為義塚。教養同族。使生死無失。所皆豪傑所當為者。善乎陶淵明之言曰。同源分流。人易世疎。慨焉寤嘆。念茲厥初。范文正公之言曰。宗族於吾。固有親疎。自祖宗脈之。則均是子孫。固無親疎。此先賢格言也。人能以祖宗之念為念。自知宗族之當睦矣。

譜牒賞重

譜牒所載。皆宗族祖父名。諱。孝子順孫。目每歲清明祭祖時。宜各帶所編發字號。原本。到宗祠會看一遍。祭畢。仍各帶回收。藏如。有鼠侵。油汗。磨壞。字跡者。族長同族眾。即在祖宗前。量加懲誡。另擇本房賢能子孫。收管。登名于簿。以便稽查。或有不肖輩。鬻譜賣宗。或謄寫原本。購眾覓利。致使以厲混真。紊亂支派者。不惟得罪族人。抑且得罪祖宗。眾共黜之。不許入祠。仍會眾呈官。追譜治罪。

閨門當肅

男正位乎外。女正位乎內。聖訓也。君子正家道。貧富不齊。如簪耕採桑。操井臼之類。勢所不免。而清白家風。自在。或有不幸寡居。則丹心鐵石。白首冰霜。如古史所載。貞烈婦女。炳耀後先。相傳不朽。皆風化之助。亦以三從四德。姆訓夙閑。養之者素也。若徇財妄娶。門閥不稱。家教無聞。又或賦性不良。凶悍妬忌。傲僻長舌。私溺子女。皆為家之索罪。坐其夫若本婦。委果冥頑。化誨不改。夫亦無如之何者。祠中據本夫告詞。詢訪的確。當祖宗前合眾給以除名帖。或屏之外。氏之家。亦少有所警矣。要之教婦。在初來擇婦。必世德。語曰。逆家子不娶。亂家子不娶。顏氏家訓曰。娶婦必欲不若吾家者。蓋言娶貧女有益。非謂遷就族類。娶甲鄙之女。以胎禍也。至于近時惡俗。人家婦女。有相聚二三人。結社講經。不分曉夜。有跋蹠數千里外。望南海走東岱祈福者。有朔望入祠廟燒香者。有春節看春燈節看燈者。有縱容女婦往來搬弄是非。

者閑家之道一切嚴禁庶無他患

蒙養當豫

兄又有小學之教大學之教是以子弟易于成材今俗教子弟者何如上者教之作文取科弟功名止矣功名之上道德未教也次者教之雜字東賤以便商賈書計下者教之狀詞活套以為他日刁猾之地是雖教之實害之矣族中各父兄須知子弟之當教又須知教法之當正又須知養正之當豫七歲使入鄉塾學字學書隨其資質漸長有知識便擇端慤師友將正經書史嚴加訓迪務使變化氣質陶鎔德性他日若做秀才做官固能為良士為廉吏就是為農為工為商亦不失為醇謹君子

姻里當厚

近則出門相見宇宙茫茫幸而聚集亦是良緣况童蒙時或多同館或共遊嬉比之路人迥別凡事皆當從厚通有無恤患難不論曾否相與

俱以誠心和氣遇之即使彼曾待我薄我亦不可以薄待之且感而化矣若恃強凌弱倚眾寡靠富欺貧捏故佔人田地風水侵山林疆界放債違例過二分取息此皆薄惡以習天道好還尤宜急戒毋自害兒孫也

職業當勤

士農工商所業雖不同皆是本職勤則職業修惰則職業墮修則父母妻子仰事俯育有賴墮則資身無策不免姍笑于姍里然所謂勤者非徒盡力實要盡道如士者則須先德行次文藝切勿因讀書識字舞弄文法顛倒是非造歌謠匿名帖舉監生員不得出入公門有玷行止仕宦不得以賄取官貶辱祖宗農者不得竊田水縱牲畜作踐欺賴佃租工者不得作浮巧售敵偽器什商者不得執務冶遊酒色浪費亦不得越四民之外為僧道為胥隸為優戲為椎埋屠宰若賭博一事近來相習成風凡傾家蕩產招禍速釁無不由此犯者宜會族眾送官懲治不則罪坐房長

賦役當供

以下事上。古今通誼。賦稅力役之征。國  
家法度所係。若拖欠錢糧。躲避差徭。便是  
不良的百姓。連累里長。惱煩官府。追呼問罪。甚至  
枷號。身家被虧。玷辱父母。又准不得事。仍要賦役  
完官。是何算計。故勤業之人。將一年本等差糧。先  
要辦納明白。討經手印押收票存証。上不欠官錢。  
何等自在。亦良民  
職分所當盡者。

爭訟當止

太平百姓。完賦役。無爭訟。便是天堂世界。  
蓋訟事有害無利。要盤纏。要奔走。若造機  
關。又壞心術。且毋論官府廉明何如。到城市。便被  
歇家撮弄。到衙門。便受胥皂呵叱。伺候幾朝夕。左  
得見官。理直猶可。理曲到底吃虧。受笞杖。受罪罰。  
甚至破家忘身。辱親冤冤相報。害及子孫。總之則  
為一念客氣。始不可不慎。經曰。君子以作事謀始。  
始能忍。終無禍。始之時。義大矣哉。即存萬不得已。  
或關係祖宗父母兄弟妻子事情。私下處不得。已  
奈何。聞官。只宜從直。告訴官府。善察情。更易明白。

切莫架橋桿怪。致商招回。又要早知回頭。不可終  
訟。聖人於訟卦曰。惕中吉。終凶。此是錦囊妙策。須  
要自作張主。不可聽訟。既棍黨教  
唆。財被人得。禍自己當。省之。省之。

節儉當崇

老氏三寶。儉居一焉。人生福分。各有限制。  
不盡之享。以還造化。優游天年。是可以養福。奢靡  
敗度。儉約鮮過。不遜寧固。聖人有辨。是可以養德。  
多費多取。至於多取。不免奴顏婢膝。委曲徇人。自  
喪已志。費少取少。隨分隨足。浩然自得。是可以養  
氣。且以儉示後。子孫可法。有益於家。以儉率人。敝  
俗可挽。有益於國。世顧莫之能行。何哉。其弊在于  
好門面。一念始。如爭訟。好贏的。門面則齷齪。借債  
討人情。鑽刺。不顧利害。吉凶。禮節。好富厚的。門面  
則賣田嫁女。厚賂聘媳。鋪張發引。開廚設供。倡優  
雜耍。擊鮮散帛。浪用綾紗。又如招請貴賓。宴新婿。  
與般戲。許愿預修。祈福力實不支。設法應用。不知  
挖肉做瘡。所損且甚。此些惡俗。可憫可悲。噫。士者。

民之倡賢智者庸衆之倡責有所屬吾日望之

守望當嚴

上可設立保甲只為地方而百姓却乃欺瞞官府虛應故事以致防盜無術束手待斃小則竊大則強及至告官得不償失即能獲盜牽累無時拋廢本業是百姓之自為計疎也民族雖散居然多者千烟少者百室又少者數十戶兼有鄉隣同井相友相助須依奉上司條約平居互譏出入有事遞為應援或合成分隨便邀截若約中有不遵防範蹤跡可疑者即時察之若果有實事可據即會呈送官究治蓋思患預防不可不慮奢靡之鄉尤所當慮也

邪巫當禁

禁止師巫邪術律有明條蓋鬼道盛人道衰理之一定者故曰國將興聽於人將亡聽於神况百姓之家乎故一切左道惑眾諸輩宜勿令至門至于婦女識見庸下更喜媚神徼福其惑于邪巫也尤甚于男子且風俗日偷僧道之外又有齋婆賣婆尼姑跳神卜婦女相女戲等項穿

門入戶人不知禁以致哄誘費財甚有犯姦盜者為害不小各夫男須皆預防察其動靜杜其往來以免後悔此是齊家最要緊事

四禮當行

先王制冠婚喪祭四禮以範後人載在性理太全及家禮儀節者皆奉國朝頒降者也民生日用常行此為最切惟禮則成父道成子道成夫婦之道無禮則禽豕耳然民俗所以不由禮者或謂禮節煩多未免傷財廢事不知師其意而用其精至易至簡何不可行試言其大要冠則賓不用幣歸俎止殺品果酒不用牲惟從儉族有將冠者眾則同日行禮長子眾子各從其類贊與席如冠者之數祝詞不重出加冠醮酒祝後次第舉之拜則同庶人三加之禮初用小帽小深衣履鞋再用折巾絹深衣皂靴三用方巾或儒巾服或直身或襖衫員領皆從便婚則禁同姓禁服婦改嫁恐犯離異之律女未及笄無過門夫亡無招贅無招夫養夫受聘擇門第辨良賤無貪下戶貨財

將女許配。作賤骨肉。玷辱宗祏。喪則惟竭力于衣衾棺槨。遵禮哀泣。棺內不得用金銀玉物。弔者止款茶。途遠待以素飯。不設酒筵。服未除。不嫁娶。不聽樂。不與宴賀。衰經不入公門。葬必擇地。避五患。不得泥。風水邀福。至有終身不葬。累世不葬。不得盜葬。不得侵祖葬。不得水葬。尤不得火化。犯律重罪。祭則聚精神。致孝享。內外一心。長幼整肅。具物惟稱。家有無不得為非禮之禮。此皆孝子慈孫所當盡者。

宗講約

彭澤王氏著

期會款式

每月兩會。或朔望。或初二十六。先時約幹灑掃。擺列書案坐席。東西相向。兩邊各幾層。宗人照班輩序齒分坐。案上各置所講書。另設講讀之席於前。負前楹。向中堂。定二人為約講。約讀。擇少年音聲響亮。或新進秀才充之。中一卓設雲板。命一人司之。為約警。所講書如易家人詩。國風。大約修身齊家。孝經小學。并將聖諭六解。國家律法。及孝順事實。太上感應篇。善惡果報之類。每會講幾條。蓋導之以經書典故。使知各當如此。惕之以法條報應。使之不得不如此。庶幾知所趨避。不為醉夢中人。

講約規條

一每會清茶多備。茶點一行。飯一食。並不設酒。講約時。不許離席。不許兩人私語。惟各端坐。專精靜聽。縱有疑欲問。并已另有發明欲吐。止須先時記存。俟其講畢。然後問。然後發揮也。

若有任意走動及私語撓越勦說之類。宗長命擊雲板一聲。便當翕然禁步杜口。如一人一會兩犯。宗長命擊雲板三聲。撤其席押之拜廟。拜宗長謝過。又家人起於利女貞。古今女誠。母儀婦道備焉。并講之。在會者熟記歸而述於母妻。亦為不約之約。講畢。有數事詢問。處置分載於後。

周咨族衆

先問會中諸族人。有身家難處之事。內心商確。凡可解免其患難。神益其身心者。無不具告。乃見家人一體之意。此會不為空談。又問族中某人。有某善行。即對衆稱揚。兼書之。紀善簿。以共相效法。又聞某人。有某過。亦委曲開論。令彼省悟。改圖。不可面斥其非。使無所容。庶幾恩不掩義。若有顯過。為鄉里共知。衆便救止。無徒避嫌。姑息以長其惡。

議察正供

一問族中錢糧。各戶當依限輸納。不可任意拖欠。至累當排年者。充代比較。若藉口

里排科收。則令其自納。止以官單付里排。應比。若數目不明。互相爭執。族長令本房公直者一人。就宗約所。辨明。押之速完。務令本家錢糧輸納。在各里之先。不須催科。庶國為良民。家為肖子矣。倘充里排者。徵收錢糧。不即完官。或花酒浪費。或營運做家。致縣中開欠戶。解此較久之。則無意完官。妄希蠲赦。深為門戶之羞。萬一有此。於約所。詢其狀。即具呈首告。蓋一時拖欠數少。猶可措辦。若節年包侵費用。窮年積歲。終必難完。其為身家之禍不小。名雖首弊。實免後災。事有反而相成。未必非厚族之一端也。

平情息訟

一問族中有無內外詞訟。除本家兄弟叔姪之爭。宗長令各房長。於約所。會議處分。不致成訟。外。倘本族於外姓有爭。除事情重大。付之公斷。若止戶昏田土。言氣小忿。則宗長便詢所訟之家。與本族某人為親。某人為友。就令其代為講息。屈在本族。押之賠禮。屈在外姓。亦須委曲調



停稟官認罪求和雖是稍屈但留此閒錢做人家  
趁此好光陰讀書窮理不為客氣所分亦是自家  
計便宜處即不敢謂人望彥方之盧或可平鄉人  
之怒而省公祖父母之案牘矣○管東溟曰凡  
祖宗有發福子孫必以陰騭啓之陰騭之至莫如  
不報無道今屑屑與族人理是非而不思祖宗不  
報無道之脉必使百年之積德  
消盡無餘而後已亦大悖也

矜恤孤苦

王惠鮮鰥寡鮮字最妙謂鰥寡之人垂首  
喪氣資與周給之使之有生意夫國於鰥寡尚留  
其生意况同宗一氣相屬者乎今人酒肉饋遺每  
施於外親近鄰家温能還報之人即往來不厭其  
頻而族中鰥寡曾不一念及之既裏塵生門前草  
長或鳩杖而倚門閭或雞骨而支牀第淒風苦雨  
舉目蕭條長日窮年無人依徠縱同門共巷尚且  
置若罔聞何况住居相隔乎偶經道過門亦必佯  
為不知更無特地相問者惟俟其死一假突胡拜

之曰予為族誼也族誼固如是乎今於講後詢問  
應卹之家派各房先後每人饋問一次多寡隨分  
即尋常飲食果實之類亦可見意有病或為求醫  
贖藥益惠不期眾寡期於當厄一體血脉相貫庶  
幾不為痿痺之民○第音子牀簣也○愚謂雖無  
宗講之會凡遇宗族親友有若此者皆當三復此  
篇思圖  
周濟

禁戢閒談

一宗約講讀古人經書商確族中事體了  
此倘有餘閑惟命童子歌詩或習禮而罷  
萬不可言及他事說鬼說夢總屬荒唐言人富貴  
便是羨入富貴言人貧賤便是笑人貧賤惟是一  
片俗心腸左有此閑言語若論飲食之美惡評女  
色之妍媸尤為市井下流即如援引邸報談及朝  
政或邊境警息或縉紳差除古人云一日看除日  
三年損道心又云士君子不可無憂國之心不可  
有憂國之言使有憂國之言而言之已為出位若  
無憂國之心而言之便為訕上俱當絕口不談若



怠惰。三曰動作無儀。四曰臨事不恪。五曰用度不節。己上不修之過。每犯皆書於籍。二犯則行罰。

禮俗相交

此行婚姻喪葬祭祀之禮。禮經具載。亦當講求。如未能遽行。且從家傳舊儀。世不經

者。當漸去之。○凡與鄉人相接。及往還書問。當與議一法。共行之。○凡遇慶弔。每家只家長一人。與同約者皆往。其書問亦如之。若家有故。或與所慶弔者不相識。則其次者當之。所助之事。所遺之物。亦臨事聚議。各量其力。裁定名物。及多少之數。若氣分淺深不同。則各從其情之厚薄。○凡遺物。婚嫁及慶賀。用幣帛。羊酒蠟燭。雉兔果食之類。計所直多少。不過二千。至一百。喪葬始喪。則用衣服。或衣段。以為禭禮。以酒脯為奠禮。計直多不過三千。少至一百。葬則用錢帛為賻禮。用猪羊酒蠟燭。為奠禮。計直多不過五千。少至二百。灾患如水火盜賊。疾病刑獄之類。助濟者。以錢帛米穀薪炭等物。計直多不過三千。少至二百。○凡助事。謂助其力。所不足者。婚嫁則借助器用。喪葬則又借

助人夫及為之營幹

患難相恤

患難之事七。一曰水火。二曰盜賊。三曰疾病。四曰死喪。五曰孤弱。六曰誣枉。七曰貧乏。凡同約者。財物之器用。車馬人僕。皆有無相假。若不及之用。及有所妨者。亦不必借。可借而不借。及踰期不還。及損壞借物者。皆有罰。○凡事之急者。自遣人。偏告同約事之緩者。所居相近者。及知者。告於主事。主事徧告之。○凡有患難。雖同約其所知者。亦當恤事重則率同約者共行之。

罰式

其罰一百。凡輕過規之。而聽及能自舉者。止書於籍。皆免罰。若再犯者。不免其規之。不聽聽而復為。及過之大者。皆即罰之。其不義已甚。非士論所容者。及累犯重罰。而不悛者。特聚眾議。若決不可容。則皆絕之。

聚會

每月一聚會。具食。每季一會。具酒。所費率錢。令當事者主之。遇聚會。則書其善惡。行其賞罰。

若約有不使之事共議更易

**主事**

約正一人或二人衆推正直不同者爲之專主平夫賞罰當否直月一人依長幼輪次爲

乏一月一更

上約中雜事

人之所賴於鄉里鄉黨者猶身有手足家有兄弟善惡利害皆與之同不可一日而無之不然則秦越其視何與於我哉大中素病於此且不能勉願與鄉人共行斯道懼德未信動或取咎敢舉其且先求同志苟以爲可願喜其諾成吾里仁之美有望於衆君子焉熙寧九年二月初五日呂大中公

**文雅社約**

節要○間有不合時宜者刪

**書劄**

古人以竹簡通名將命者出仍以還之蓋終身所用惟此一簡不易爵里不削牘也今人每次

郡東南十里許有文雅臺吾夫子習禮之處而記稱嬰相之圃也歷數千載故址宛然厥維勝域吾輩適會林下結社於茲期挽世風稍還古昔遂以文雅標社而具述所約之事歸德沈鯉仲化甫書

齊家寶要

卷一 文雅社約

是

禮及慶賀高年者用尋常紅箋不用大紅毛邊其餘請帖禮帖及通問書劄止用兩幅白簡裏外俱不用紅箋如禮物件數開載不盡分上下二層敘事不盡則量加幅數適用而止謝禮仍用單帖不必求稱如連名送禮亦止回一帖傳覽有稱謂不同另加一帖○人有自外致書者既以書答謝又另有謝帖甚屬無為曾記數年前寄書行禮者只書後貼紅紙一方開具禮物何其簡便宜以為法○書詞雖不費錢獨不費精力乎且文勝則真意衰矣每見前輩請帖止云明日一茶真意自在今擬請帖寫某日請教或酬愛或敘濶並啓知六七字速帖用單只寫一速字俱不用文章語○護封起自公文原為關防秘密隆慶初年縉紳通問用者猶少後始蔓延鄉俗一槩用之甚屬無謂今擬請拜等帖止用書夾投送封袋可省有啓事者用封袋不用護封

**宴會**  
設席過豐則多戕物命多損精力多費貲財多抗福分或客當醉飽之後見主人舉筯不得不

**舉者**蓋反為多設所苦暴殄天物亦甚可惜吾鄉嘉靖年間具啓請客者每卓止設殺四太盤四人圍坐飯一餐酒不過數行辰刻至食畢即散簡樸若此今俗乃洽辦累日方敢發簡而客來赴席者亦常至日暮或徹夜乃散中豈無亂俎豆失歡好為賓筵羞者乎又何言多費也○憲約燕賓四豆猶是古禮恐未易從今擬折簡請客者用果四色饌八色湯飯三道若官席遠客量加品數其看花太席人物餅餠五牲之類俱不用赴席除開訪留坐者即不拘時候早晚太席宜午後上座薄暮而散邀帖後止速二次如遇該行酒之時客有未到者即虛坐行酒不必久候蓋早至早散不惟我無德抑亦體悉下人○古人不常殺牲亦不皆食肉禮云諸侯無故不殺牛大夫無故不殺羊士無故不殺犬豕此知其不常殺牲也左氏曰肉食者謀之肉食者無墨食肉之祿水皆與焉此知其不皆食肉也今市肆品味甚多以充俎實儘自足用又何必更宰雞鵝求備物哉昔人云食者甚美死

者甚苦。君子有敬客之心，不可無愛物之心也。○主人安座，遇慶賀大禮，則逐位行酒，尋常宴會，客雖多，但舉杯總揖，乃遍歷客席，各一安座，至席前再總揖而已。○合席請客，主雖多，其舉杯行酒，只屬之長者一人，餘惟隨班行禮，蓋長在則禮宜然也。若長者既已安座，眾主又安一週，似屬煩瑣，且不見長，長之義於禮宜省，眾客酬主人亦然。○舉酒有當，行拜禮者則拜，其跪禮於古無考，宜革。○客有後到者，眾賓敘長幼，一揖相于者，另一揖不必讓轉，告坐亦然。○宴後不用謝帖，相會時再揖而已。○鼓吹絲竹，慶筵可用，餘席不用為雅，若媚優入宅，舍敗壞風俗，引誘子弟，可忌不止一端，俱不宜用。○宴取成禮，酒以合歡，主人款客，只可相勸，不可相強，沉酒淋漓，至於生禍，悔且無及，何歡之有。賓之初筵，所宜三復。○犒賞從人，惟婚姻大事及自遠而至者，宜特設酒飯，不必設設。

**稱呼** 宜止用本色。如古人上宰相書，則止稱相公閣下。上翰林書，稱內翰執事，蓋不欲媚其所無也。

然猶云異代事，今吾鄉徐正人先生家，尚存有天順年間翰林曾公榮贈言一軸，其標題則直稱贈鴻臚卿徐君永達之任湖廣廉憲序，其中云：永達勉乎哉，者復不一。永達者，徐公名也。予考其特，公非有師弟子分，特樸直若此，而吾家亦存許都諫復禮與先大父建寧公手書，亦止稱舊德沈太守尊師執事，蓋許公先大父受業門生也。此正德末年事，夫稱名雖未必合中道，若今俗下槩稱台柱，稱翰揆，則媚人所無矣。今擬有官者稱官，如太守如相公，內翰例其鄉俗往來，止徑寫字號，及其姓某親，行幾伯叔兄弟，或某老先生，俱不過六七字，俱不必有別稱。○字以尊名，故古惟稱字，以致敬也。子思孔子之孫也，不常字仲尼乎。吾鄉當嘉靖年間，尚止稱字，無稱別號者。今僕隸下賤，已莫不有號矣。士大夫不敢稱全號，而加稱翁老，或少年而輒以稱翁稱老者，夫父母在，恒言不稱老，少者稱老，老者何稱，亦嫌於不祥矣。今約除尊長親屬，各自有應得稱呼外，其平交止稱字稱號，尊輩

稱老先生長者  
稱某兄某丈

揖讓

主人迎賓。三揖升堂。此所謂揖。不過舉手。或身稍磬折而已。今一見則俯身至地。送客出門。則遍臨車馬。逐位與揖。入門。又望空一揖。或賓主相讓。良久不決。俱屬非禮。蓋讓不過三。古之道也。今約迎客者。客至一躬。及階及門。舉手相讓。送客至大門之外。一揖。客及車馬。主人入門。各一揖。客乘車馬。主人出門。舉手相顧。俱不必差。人拜上。蓋送客揖車馬。於禮所無。而每客送及車馬。尤為瑣屑。宜革。○四拜所以尊父母師長。拜而叩頭。臣子見君上之禮也。豈可以一槩加入。今後相見行禮。只兩拜。有當稱謝者。則起身再揖。勿伏地連叩。○親明偶遇。止宜敘長幼。一揖當致辭。稱謝者再揖。不必讓轉。蓋長幼有定。賓主有禮。而久讓不決。似為虛文。宜省之。客有先施。而主人及門答拜者。雖往來常禮。若不係慶弔大事。但尋常相訪者。亦自可省。○禮父黨無容。今考諸王。朝見儀。凡伯叔見天

子行。君臣禮畢。即向便殿。行家人禮。伯叔西向坐。受天子四拜。朝家且如此。何士庶反不然。今擬四拜之禮。父母坐受。親伯叔父南面揖受。族伯叔父東西向再拜。不答。兄弟交拜。不受。凡兄弟不論賓主。兄東弟西。凡兄送弟。伯叔父送猶子。俱不出大門。不候騎乘。親親之義也。世有揖讓迎送。如賓客者。殊為疎薄。相外之風。宜改之。○古人於父執至嚴。有坐受八拜者。嘉靖年間。子親見新進朋友。尚不敢與前輩齊肩相見。則稱曰齋長。或與服勞役之事。不以為為。今俗其有是。否耶。顧此義在。論語鄉黨篇。恂恂如也。似不能言者。兩語內。可佩之終身。有餘矣。今與諸公約。凡在本族尊輩前。雖士宦不得據上坐。遇父執。及相知高年者。必以容執。緩必下。其餘亦各以情義輕重。自執恭謹。禮云。敬老為其近於父也。敬長為其近於兄也。吾敬吾父兄。成吾孝弟。亦何誦之有。○讓自美德。忍徵木受。孟子三自反。終以不校。於橫逆有何難處者。乃世人以一不忍。率至大事。甚至有生平。刎頸累世通家。

一忤睚眦即成讐讐或瞋目攘臂或稱干戈或  
抉發曖昧揭布通衢或鼓扇朋儔併力攻擊雖足  
逞雄心亦大虧雅道矣吾鄉俗幸無是而前輩滄  
司空先生處盜一事尤為可傳先生方致仕居田  
間夜忽有羣盜入室掠無所得皆羅伏階下叩頭  
請罪曰吾儕小人不知大君子若此而誤驚犯罪  
誠當死儻蒙恩鳥獸散不就縛乎先生曰不然即  
不能有所贈何至使公等枵腹乃呼其夫人出自  
牀下督婢子治酒飯使各霑醉飽叩頭而去遲明  
賊捕掾及門請罪願刻期捕獲之先生曰無是也  
竟寂無一言觀先生處暴客若此知橫逆之來能  
笑而受之有餘矣吾願諸君子之為潘先生○老  
氏曰自勝者強考亭註強哉矯章句亦云自勝其  
人欲之私夫人欲之私爭忿其一也人若於此處  
能強制不動非有大涵養大力量者不能其出而  
任事必且能砥柱中流解紛排難皆平時所翕聚  
然也彼按劍疾視者何為哉○爭忿最難忍若忍  
得過去却便有許多受用不能忍而致禍患所謂

一慙之不忍而終身慙也苟念及此忿心自息○  
世俗繁文日益真意日減損有餘補不足深有望  
於篤古君子○附周海門曰今天下專書一統而  
實主相見禮乃有南北之分南尚右北尚左不知  
起自何時朝廷上有文東武西之分似宜以東為  
尊然而武官之品級每在文職之上班首官皆以  
公侯未可定以東為尊也主人陪賓北向而坐齒  
爵相序則長席俱左南人皆然而相揖何以不爾  
由此而推宜盡從北禮可也三族之親人共知之  
而禮所當守一毫不可踰越本族無論已母族稱  
舅者即母之兄弟雖疎遠之極亦當待坐子郡邑  
皆然而他處有不然者非也妻族之禮曾見孔叢  
子曰妻之父母為外舅姑拜之可知妻之諸父則  
以親配德年以上拜之可也幼於已者揖之可也  
此出於人情而可常者也今之人能盡知此禮乎  
昔陳涉為王妻之父母往焉涉以眾賓待之長揖  
不拜無加其禮妻父怒曰怙亂僭號而傲長者不  
能久矣不辭而去涉隨滅亡禮之不可忽如此姑



夫之親似在三族之外然姑者父之姊妹也姑之夫即與伯叔等雖疎遠亦難並行並坐吾嘗見陶石簣官至祭酒尊矣而見疎遠之姑夫行不並行坐必侍坐或強之少假決不肯觀此可以作則矣

**交際** 嘉靖年間親朋往來之禮銀尚不過三分五分以至一錢亦有携盒酒舉賀者有三五相約共一盒酒者然猶酒不過一壺盒中物不過小菓小菜三五品客入門與主人一揖即舉觴行酒賓主酬酢俱不過三酬酢已畢賓主交拜自是賓不更修儀主不復請謝而情意亦自周洽何其古雅簡便也嗣後彌文日盛有因而廢家廢禮者有較量往來厚薄寢成讐怨者有公然為假酒假段明示相欺者風俗薄惡如斯不返何所終極今擬婚姻及大禮從宜用幣其尋常賀奠自一錢以至五錢皆為厚禮不可更加其一切假酒假段槩宜停止○古者以八十為下壽近世常慶七十然十歲一舉猶不為侈今人不拘老少每歲生日大張宴樂此無名之費也程子倍哭之說蓋深譏之老年借

此以聚樂小集可也○賀祭等軸所重在文用紙為便錦軸金字濫費無益通屬可省○鄉俗二十年前開具禮單者尚皆以謙為主如酒云魯酒帕云紕帕是也今則不論美惡率皆飾以佳名故美者近夸惡者涉欺矣雖細事亦長偽之漸也宜返而之初○人家稍能度日即不務本業到處人情三錢五錢時常湊辦其為苦累十倍征徭得之艱難費之倏忽亦何愚也○親朋往來之禮只可視情義疎密以為隆殺若乃計家道貧富作青白俗眼量子姓興衰為炎涼世態者則市井交易之道而風俗薄惡最明顯者也○有道君子必不其然○禮尚往來雖本人情君子有施亦盡其在我者而已不必過責望於人近聞鄉俗之人有一挑一李必求相稱者甚為可鄙世豈有操券以行禮者乎惟受人之施力能為報而自處鄙薄失禮者亦無怪乎人之責之也

**冠服** 冠加於首最宜雅重衣以章身惟貴明潔○玄黃紫三色惟朝廷得用今人有不知玄紫而誤

用者乃黃亦敢僭豈其不知宜以相戒。○國有國風家有家風。女飾妖異家風之陋也。君子必慎其微焉。○未冠勿遽稱別號。未娶勿遽衣文錦。禮老少異。蠶童子不衣茅。鳥夫不衣裘。鳥者非止謂年幼不宜亦使知老少之分。知惜福。知養正於蒙也。○僕從衣履不可與主人相疑。所以正名分而尊其上也。達禮者審之。

閑家

禮與敬。有家之善物也。人情每誦外而略內。故根本之地已先不正。豈能及遠。自己一身且不足觀。豈足為子孫觀法。所以士君子居家須莊敬且強。禮儀卒度。不可以狎。迹忽之也。○世俗有父子異居者。或有不得已之情。乃亦有同居異爨者。獨不思吾之身。吾父母之身也。故與分爾汝。析七箸各食其食。各享其有。如路人然。可乎。不可乎。假當食時。親猶未食。吾能下咽耶。當親食時。不知肯否於心安耶。夫妻以秦晉而同牢。父子屬毛裏而互異。根本之地薄已如此。更有何處可與人同。此

雖習俗相沿。不可視為細故也。○鄉俗於禮文病繁。惟夫婦最略。或至有經年不相揖拜者。狎故也。豈知禮在狎處尤不可少。只觀初親迎。至合。色於諸禮。何所不備。乃日久而遂忘之耶。○禮稱女子出。擁蔽其面。已嫁而反。則兄弟勿與同席。而坐同器。而食而叔嫂不通問。其嚴若此。昔魯敬姜年老矣。且上卿之家。而季康子其姪孫也。相見與言。皆不踰閫。君子曰。知禮。今人家婦女有託在肺腑。至親而男婦同席。笑語一堂者。俱非美俗。閑家者宜以是為第一義。○人家有關防內外者。止計較外來男子。而不知外婦為尤甚。蓋此輩多窺探人意。搬弄是非。其為長舌。銛於利刃。却又無可防之形。奈何。以不親不故之人。而縱使出入無忌也。安知其非尸祝巫卜之類耶。若論其至。即同宗至親。彼此家婢。往來通問者。亦宜貴簡矣。○宦家子弟。凡居食器用。僕從輿馬之類。所貴雅淡。不宜使俗氣撲入。○附何氏曰。凡俊麗虛華之僕。不可一朝居也。又曰。僮僕雖自幼過繼者。亦不宜令入卧房。使

知儀節所在。若以為小而不禁。長大不可制矣。或遣餽送於出嫁之女。止令中堂奉其所尊。切不可徑入內室。與女私受。陪其為饒賤不孝之人。又不可使之訊問消息。萬一發峻是非。致構兩家之怨。女既有家。非大故不許歸寧。無服之親。不得令其喪送。及行慶賀之禮。親戚有請祭掃遊春者。不過誇賽珠翠羅綺。槩宜謝絕。此亦保身保家之大法也。

馭下

凡驕從不宜太多。蓋吾輩鄉宦皆好為事。而僕令一鄉宦使十人。十鄉宦使百人。則一邑有百鄉宦矣。嗚呼。一邑中百鄉宦。其氣豈不薰寒邑里。無復有空閒處所耶。矧復有兄弟子姪。亦皆以鄉宦行事。而僕從亦皆稱鄉宦僕從也。於鄉人何堪矣。夫一人之身。而人之藉。我為用者。若此。其眾吾兩手兩目。既不能遍。戡之。乃猶復招延之。未已。豈不益自苦哉。予既已驗之。久知之。真何敢不盡言。與諸公相告。太凡僕從。只將就足用。不必太多。太

多則衣食於我者侈矣。故曰官事不攝。焉得儉言。侈也。夫公家不堪侈。况養之私家乎。若謂有不衣不食。而為我服役者。則益不可。何也。彼不衣不食。而為我服役者。非徒也。必藉我以行其私也。彼藉我以營私。吾因彼以斂怨。則我之役彼者。一時奔走之微勞。而彼之役我者。終身名節之太窳也。此詎我役彼。而實彼役我也。奈何役人者。而反為人役哉。縱不然。而堂堦之上。森然林立。車馬之間。簇如雲湧。亦甚非有道者宜處矣。○凡僕從以庸受來。愬者直笑曰。我不曾眼見有駕言毀罵主翁者。直笑曰。我不曾耳聞則下人無所售其欺。而我亦不為彼激怒。以燭吾天和。致有他事。蓋一忍之為效多矣。○有爭一兩錢之利。而與人且喧於市者。吾輩手下人之買辦是也。夫吾輩豈區區與人計較者。惟下人不能體吾意。而欲有所染指。則不得不股削於人。夫豈知田野小民。斗粟尺布。入市營求針頭削鐵。一家性命。我却要在他身上計便宜。能得幾何。縱使日日買辦。常過其直。一歲之中。所

費幾何。顧令人當面咨嗟。背後談議。孰與多寡。自  
 今宜嚴飭下人。入市買辦者。務使入爭售之。勿使  
 人望而避匿也。○每見宦家僕從。遇其主翁。親識  
 屬。在寒賤者。即肆與抗禮。且屑越之。其主翁亦恬  
 然。不以為怪。此詎非名分倒置。風俗薄惡。一太事  
 耶。吾輩宜深以相戒。○吾名責僕婢。則推吾愛子  
 女之心。吾婚嫁子女。則推彼為父母之心。不寧惟  
 是。即寒暑饑飽。疾病勞佚。與其心中微隱。有疑  
 慮而不敢聲言者。俱一一體悉之。而後得處下之  
 道。○附許台仲曰。過房未醮男女。給夏衣帳。不過  
 四月。望給冬衣被絮。不過十月。朔祇禦寒暑。禁飾鮮耀。

甲宅

人家起造房屋。率多踰制。然不知屋宇大廣。則  
 陰氣盛。而人氣不能充。故其勢不得堅久。而居  
 者且多不利。此昔人所以有木妖之說。而謂其不  
 安人也。○田為常產。所以不可無。然惟貴約而易守。  
 實而得用。不必太多。太多則不免多費。資本多有  
 荒蕪。多損精力。多招詞訟。多辦糧差。而計其所入。

亦卒與約者。實者不相上下。何以侈為。○凡置買  
 田宅者。有三不虧。有七不買。何謂三不虧。寧虧富  
 不虧貧。寧虧明不虧暗。寧虧人於無事之時。不虧  
 人於急難。此所謂三不虧也。虧貧如小戶人家。無  
 多田產。而含悲出鬻。以救目前。虧暗如錢債折準。  
 貨物擡算之類。虧急難。謂人有急難。而鬻產以自  
 營救者。何謂七不買。老年之父。婦居之母。有不才  
 子。不能管教。或少孤子。蠢愚子。不識好方。而聽信  
 奸人。撥置所鬻之直。十不償一者。不買。已絕之產。  
 未有着落。相持之產。未經倒斷者。不買。宦家子弟。  
 覆敗之業。任他人買。惟為宦家者。不買。業師契友。  
 之遺產。不買。墳塋中。房屋木石。先賢祠廟。不買。與  
 勢相爭。自知不敵。以來。投獻者。不買。累世之鄰。非  
 十分輸心。欲賣萬不得已者。不買。此所謂七不買  
 也。而就中惟欺人孤兒寡婦。與侵及泉下者。為尤  
 甚。凡置產為子孫長久之計者。宜致審於斯焉。○  
 世俗有產與接壤。被人買去者。其勢必爭。爭不已。  
 必至於訟。訟自常情。不謂無理。惟吾輩為此舉動。

便覺不雅。今後如遇此等除逼近墳塋墜墻屋者，仍與從容理講。其餘不必理較疆場之事。一彼一此，何常之有。如曰：與吾鄰也。必我宜買。漸買漸遠，直至何處。方始不鄰。眼界闊，氣度大，看得此處自然渺小。○孝友先生朱仁軌云：終身讓路，不枉百步。是說勸解之。○治家者當先治守家之人，不及於此而孜孜於彼者，非計也。○宦家子弟以財產相爭訟者，其後言前人之貴，常過其實。蓋其意惟主求勝，而不恤先人之面目。○置何所真，自可恨。然而導之者其誰乎。前人道子孫以危，後人遺祖，父以貪，首尾相貫，勢所必然。故創業貽謀者當慮其後，慎不可輕留此尾也。○兄弟以財產相訟者，如兩人爭一玉卮，各將其半，雖奪得在手，無益於用。徒自取戮辱而已。○附陳幾亭曰：勿買瓜葛不明之產，勿收來歷不明之僕。交易時宜詳審，而後行。倘一時為人所給，後有相告者，即宜核實，而吐還之。理取原價可也。凡中保僮僕之輩，競謂吐還

器用

為失體面，恐人非笑，此最愚之見。始也不知而買之，既也知而吐之，如日月之更，眾方感仰之不暇，其誰非笑之者。若堅遂前非，必招怨恨。招罪詆，訟獄費神思，躊躇費筆舌，于請究竟，亦必費錢財。所失殆不可勝計。然則法成湯之改過，不吝反失體面乎。法小人之過也。必文反得體面乎。凡置產買僕者，必麤足衣食，麤讀詩書，否則列士夫首。民庶者也。苟抱一隙之明，豈得再計而央哉。燕器除純金例，不得用。其諸凡銀器等物，則亦皆動色。招尤起釁，且自茲始。反不若陶匏瓦缶，為便也。他如珍寶重玩，是謂尤物。人見之無不垂涎，而傳家至寶，其與人必多吝惜。求而不與，禍且立至。何者，凡有求此等物者，必皆有氣力。能禍福人者，也。而蓄此物為人所求者，必門祚已衰。可中之以禍者，也。平泉醒酒之石，至不能保其佳子弟。非所謂匹夫無罪，懷璧其罪哉。亦可謂千古明鑒矣。○里中富人艱難起家者，其居家器用多不具備。

亦不求華美。及後子孫侈大，則反笑前人為各為野。一服一玩，無不盡飾。至有一扇之資，可飽百人者，豈不可惜。然亦不旋踵而遂索然矣。

勸義

鄉約孝順父母，尊敬長上，和睦鄉里，教訓子孫，各安生理，毋作非為，俱日用切要之言。士庶宜終身佩服者也。當各書一牌，尊奉於門屏，冠冕處使家眾子弟出入瞻仰。當有興起而鄉俗亦必有做而行之者矣。○人無不愛其子孫者，獨有不孝順父母的。此何故？夫子孫我所生而父母生我者，其天性至親，豈異乎？且除却罔極深恩，不具論。夫以罔極之深恩，而不得與襁褓之嬰孩同視，亦真可痛哭流涕矣。○人只一不孝，便百行俱不必言。人只一不孝，便五刑無出其上。夫豈得無悔乎？亦豈得無懼乎？○在家有家長，出外有師長。城中有官長，通天下有君長。此皆吾長上也。人若能循理守法，便即是尊敬長上，不專在儀文交際間。假如為士而講求經濟，化導鄉俗，庶人而謹辨征徭。

輸心捍衛，便即是恪修職業，盡忠朝廷。不必有官守而後為效忠盡職也。○和睦鄉里的，便即是春融景象。人已物我均一，暢適烈日嚴霜，凄風苦雨，有望而畏之耳。人於斯三者，何處焉？今人只看得和睦鄉里的，常要在幾分忠厚，費了些財物，却又不肯去和睦，所以鄉里間情誼乖離，俗不長厚也。古昔盛時，鄉里同井，出入相友，守望相助，疾病相扶，持則彼此緩急，胥相倚賴，何費之與有？假令一人如是處處皆然，將太和景象，且在字內，何況一鄉哉。而謂為不緊要者也。○父母無不知教訓子孫者，惟其所以教與子孫之所為成立者，常相反。蓋子孫之成立，以勤而父母憐以惰。子孫之成立，以儉而父母導以奢。子孫之成立，以安而父母遺以危。子孫之成立，以約而父母任以放。子孫之成立，以正而父母趨以邪。是知教而不知所以為教也。故聖訓猶復諄諄焉。若曰：雖有教，與不知教訓者等耳。○教子孫無先於耕讀兩事。顧讀書之法。

具有先哲弘規良師嘉訓惟務農者必使知拾糞如拾金趨時如趨利鋤莠如鋤盜逃佃戶如逃才亦教家急務也。○人各類常業以生然不謂生業而謂生理者以循理則生不循理則不能安其生也。蓋本分之外無所營求左始為循理者已。○常人無非為則保其身家士大夫無非為則保其身名蓋常人不可責以苛細士大夫不可不致謹也。以其平生盡棄之故比於常人尤不可不致謹也。以上恭解六論。○卑中有節孝仁義出自委巷者不必論曾否相識俱宜率同志備禮贊揚以發潛德其孀居守志無所依倚而家貧不能自給者歲終亦宜勸助粟帛以慰其志俱同所親識與之。○吾鄉前輩有二大君子者九原可作所願執鞭矣。○使無過佚拂拭遺胤不至落莫則後之君子與有責矣。○以勸善一以厚俗其可忽諸。○今人多好放債盤利夫子不云乎放於利而行多怨謂有利於已者必有有害於人也。顧世有自然之利而又有

不怨之利乃無有言及者何哉。凡多積陰德諸福自至這一般利是取之於天盡力農事加倍收入這一般利是取之於地善教子孫後嗣昌盛這一般利是取之於人諸如此利俱不用文約不費貲本不定分數不用追討不傷和氣不取怨惡不招詞訟不致玩陷不怕花費却正大光明傳得久遠何以不為此而為彼也。○古人重遺簪遺履不忘舊也。今人但一登顯要則舊時親識屬在寒賤者遂皆削迹於門前乃另有一翻新客以間故舊此等世道最易得入人眼目虧損厚道。○負死友者之害義比負生友者為尤甚交友者其戒之。○人情聞人善未必肯聽聞不善則樂意相傳世風薄惡莫此為甚吾屬其相務反之。○君子處心行事須要以利人為至利人原不在大小但以吾力量所能稍與人行些方便即是有益於人。人當渴時與一杯水即是恩惠顧惟在行之可久耳豈可謂小善不足為。○余數年來每當嚴寒之候私料郡城中貧人舉體者大約不過二百人如同社五

人協力周濟計每人止可費綿襖四十領每襖一領該銀三錢總費銀不過十二兩而國中無凍死者矣况蒙薦施與貧人亦可禦寒每百件不過二兩如五人合治二百件則每人止費銀八錢此又為不費之惠也仁人君子肯惜此小費而坐視此輩寒瘵而死乎○新歲元旦草木羣生之物皆有以自樂而人家往來相拜亦各以椒柏勸飲獨忽見乞丐殘杯冷汁不能於此際得一飽乎數年中每見城中行乞者大約不過五百人計每人與肉銀不過二兩如先期部分已定至元旦且五更時候分遣所部各分一方四門四關一刻可遍惟不令及門不使知為誰施捨者自無有相聚喧攘之弊○施藥不如施方俗有是言乃田野小民常苦於無錢取藥遂以至死者殊為可傷余每聞人言海上單方有不費一錢可取奇效者余每嘗試之果驗如好義君子肯各出所聞遍貼於人烟聚集之處則濟人陰德比於施藥相去霄壤矣○附袁午葵

曰如欲施藥宜修合丸散丹膏數十種彰彰可驗者遇有疾苦須細察寒熱虛實施藥治之其疑難之症不可妄與恐致誤人○橋圯路凍當助修治以便行旅○四達之衢宜建亭開井常時施茶三伏則于午未二刻用薑鹽涼水以解暑毒降冬則于卯辰二時煎薑飲椒湯以辟寒威至或單身羈旅負販窶人霜天曉夜跋躡候門勸人效粥擔法每早施一二處以天明而止為德甚大○積雪堅冰之時作俱里中掃雪鑿冰方便行人以免顛蹶尤為不費之惠○擔負貧人遇雨尤屬切身厄難木衫濕透膚體淋漓捱步前趨忍饑耐苦陰寒入裏遂致疾纏或至危亡家口何賴所以雨途無益於事若緩於情實迫若能多置箬笠散給行者或擇誠幹好善之人貯往來要衝之地施借兼行受還隨便所費甚小所全實大至於泥塗寒凍或施草履蒲鞋暮夜晦冥借以燈籠火草均屬陰功所宜留意○或遇軍興往來民夫扯牽極是苦役兵未到時預羈冷室忍餓臥地無異囚徒打緯催趕



不問晦晝倘值積雨深泥塘岸淹沒蹶跌漂溺苦  
 情難狀至於撥夫扛擡軍器搬運物料鞭撲亂行  
 饑寒莫恤若不設法救濟必然病患死亡大宜普  
 勸仁人慨為領袖轉相募助或懇好義能仁經理  
 其事禁候之夫資其乏絕關津要處煮粥均施或  
 扶危持顛或贈履給錢則雖行役之苦亦叨救濟  
 之惠矣嗟嗟兵荒游至禍患不測眼前毫粒豈我  
 固有乘時積德補救劫運既頌仁慈兼欽智慧矣  
 明微人恒言不愧屋漏夫屋漏何能知何能言愧與  
 不愧亦何能辨之夫准妾孳僕從者日侍吾左  
 右而見吾至隱是屋漏之能知能言者人能不愧  
 於妻孳僕從乎即不愧屋漏矣○律例有極輕條  
 款盡數摘出與家塾子弟閒時講解則彼知世俗  
 之所謂無傷者皆法之所不得為也而凜然不敢  
 肆夫豈非精義一助乎○世俗每見人行事苛刻  
 貽害於人者則指而疾之曰沒天理至有毀人於  
 言語文字之間者殊畧不介意夫空言在一時文  
 詞傳後世其久近固已不同矣若其人名愈重詞

愈工文致其事者愈奇則其虧損天理也為愈甚  
 ○面諛之詞有識者未必知感背後之譏銜之者  
 常至刻骨彼作好作惡者徒自苦而已○凡兩怒  
 則必有溢惡之言溢惡之言與之相傳是挑釁也  
 以忠厚存心者不如是○士君子聚談間若只依  
 傍道理而藉以和氣平心自有深趣自爾淡洽戲  
 謔詼諧恐其始乎陽卒乎陰矣酒中言語尤易支  
 離所宜相戒○至愚之人必不肯詛毀其父母苟  
 行事乖方鏗刻人意有不毀及其父母者乎然則  
 非自毀之也一聞耳為人子者宜兢兢在意焉○  
 人情見殺生則不忍乃獨於蚊蠅之類恒盡族而  
 殲之曾畧不動意非以其微物耶夫物誠有微巨  
 乃好生惡死則一蚊一蠅即一我也士君子欲充  
 其不忍之心者當先自微物始○非公事未嘗至  
 於僂之室似亦當事乃當時遂以為得人其不然  
 者謂當如何士大夫宜知所自處矣○兩造之詞  
 其理直何待人言其理曲安可與言此君子所以  
 貴慎言也○僕從不可墮主姓久之則彼迷其姓

而我亦瀆吾姓乃遂使彼忘其祖而我亦瀆吾祖也。蓋一舉兩失矣。○仕宦居鄉百凡炫耀所謂眾皆悅之其為士者笑之也。○仕宦居家被人侵侮固亦常有是事然畢竟是我好處若使人望影遠避無敢拾田中一穗者雖足快意其為人可知矣。○荒歲餓殍載道而富貴之家歌舞歡呼似非所宜。○小民非能壞風俗以觀望所不在也。其惟士大夫之責歟。士大夫家百凡好尚不可不慎。○鄉俗元旦家家設天地神牌祭以牲果祭畢始各祭祖先其意雖善却僭分且甚褻矣。蓋天子祭天地士庶人何與焉。古南郊壇地行事器用陶匏牲一饋謂無物可以酬德也。烏可以常享薦若謂祭天地衆神如所稱萬靈真宰者則益泛而不切矣。今擬是日五鼓止設香案於天井北向行四拜禮此外更不陳一物疑稍於人情為近而禮亦無妨。蓋人生兩間天覆地載亦吾父母當此新歲舉目而青天在上全不為禮於心安乎。庶人不可以有獻於君見君而不叩頭非禮也。邵康節云每日清

晨一炷香謝天謝地謝三光則叩天之禮邵子行之不以為僭故余於鄉俗亦然。○卑社有春秋祈報自是古典惟科歛民財搭臺演戲連日累夜甚非美俗且易啓禍端多耗錢貨凡作此者多非卑中安分良善之人所宜禁止。

身儉

夫日用事物之為侈侈矣然必有由侈者身是也。蓋身其本乎。日用事物其身之運乎。孔子曰以約失之者鮮矣。疏者曰不侈然以自放之謂約則身儉之說也。而本其在茲矣。意將以仁義道德物吾身以綱常禮樂範吾身以忠孝大節立吾身以謙和退讓保吾身以不殖貨財裕吾身以貞靜寧一定吾身而後為身儉而後為不侈乎。

心儉

夫身儉本矣。有本之本者心是也。心在乎審所好尚。心好靜則必不好動。不好動何侈。心好簡則必不好煩。不好煩何侈。心好雅則必不好俗。不好俗何侈。心好澹則必不好濃。不好濃何侈。故雅

靜簡澹者皆以養吾心。而正吾本之本者。也。其不然者。雖稍能勉強乎一時。而見獵心喜。忽不覺引我去。蓋身為侈數。豈復能移風易俗哉。故曰有本之本矣。○嗚呼。凡我同志。有主辭。尋盟者。主守。辭豈難盡守。實易渝。凡我同志。有如不社。余言而憇寘於耳也。則吾言為已詳。朝匪血。而夕弁髦之。即是編贅矣。宋人沈鯉仲化述。

社倉議

一有司之積穀備賑也。自公廩外。則又有社倉。有實惠。而公廩顧反有不及者。何也。蓋當其積貯之時。而已寓賑給之地也。請得究言之。公廩率不過一二所。社倉則各方各里。各有建置。積之多方。備之無窮。而散輸不越境。其便一。公廩者官自為之也。其勢獨。社倉者官與民合為之也。其勢分。分則共其力於眾。獨則總其勞於已。眾力易舉。獨任難周。則任獨不如任眾。其便二。公廩必須憑單排舉。報而單排諸人。皆素以漁獵自資者也。報

者未必貧。貧者未必賑。反使公家積貯。徒以惠奸。則賑施文具耳。社倉有殷實公正。眾所推服者。為有司分理其事。而又有賢士大夫。可備咨訪。故本里民執貧孰否。孰上孰次。一一皆有真見。粒粒皆有實惠也。其便三。公廩必須按里排次第。較凶歉甚否。逐一審問。有司或有他務相妨。則勢又不能速審。曠日持久。遂使枵腹垂斃之民。日需次。逆旅之舍。而所得不足以更費。至有垂囊以歸。或不及一餐。以死者。可哀也。社倉則各濟各方。隨投隨給。其周之若燭照。而予之如取携。其便四。公廩不免有盤撥轉運之煩。有需索使用之費。有斗斛高下之分。有推挽負戴之勞。而社賑則悉無所累。其便五。公廩率不過一二所。而境內饑民。嗚嗚待賑者。常千萬計。駢肩累足。沴氣薰蒸。疫癘不免。或更有他虞。亦不可知。社賑則各里各坊。分局各濟。散而不聚。自不患此。其便六。公廩必上棟下宇。有磚瓦木石之費。有透風重簷之設。而雨雪薄簷。易於沾濡。鳥雀緣空。易於剝啄。食鼠穴墻。易於圯壞。則又

必歲時修葺費且不貲。牙穀既入倉。陳陳相因。則紅腐而不可食。出而曬。曬之則暵。暵則滅。且有因緣為姦利者。而社倉則狀若圓困。所需惟草木泥芭。無磚瓦木石之費。日色易透。故不煩曬。曬無重簷。故鳥雀難入。倉四周皆時有人跡。故鼠不為耗。其便七。民俗之日。以澆漓也。如逝波之東下。而不可復反也。社倉既立。則里閭共為有無。必講有同室之誼。一體之情焉。蓋不但緩急相周。即百姓親睦。民德歸厚。亦且由此。其便八。人情不能無公私。今令於國中曰。吾勸輸。輸出爾私藏。而公諸同邑。不相識之人。非甚儻誰肯應之哉。惟各社有倉。各勸其社之居民。家道殷實者。各自為備。出其餘。以待昆弟親戚之急。人必不能忽然於此。而荒年賑濟。亦惟在此。方之人得用之。而不以泛及其他。且輸者有時。而貧亦反。自取給焉。嚮其利為有。福此民之情也。因而導之。當令下如流水。其便九。夫是九者。惟社賑有之。而公賑殊不然。吾故曰。社倉有實惠。公廩顧反有不如者。則謂當積貯之時。

而巳。高賑給之地也。○欵欵石畫。惟第七。議便於鄉都。而不便於城市。宜通變之。議一。社倉之便。有九。余既備述之矣。因而思之。又社各賑。力出眾家。則豫分矣。社貴核。核則不壅。今各社各賑。自為耳目。則豫核矣。賑貴速。速則不滯。今各社各賑。一時並舉。則豫速矣。賑貴委。委用得人。今各社有賢士大夫。可備咨訪。又各有殷實公正之人。可選充約正。約副。非如彼布井無賴。高下其手者。則豫有人矣。惟豫則籌畫夙定。不倉皇失措。給散周徧。不顧此失彼。痛癢相關。不隔越阻。閔疏分某置。不爭門措指。故實惠常究於下。而督責不煩於上也。昔項梁居吳。吳中子弟孰可用。孰不可用。蓋於主喪。豫別之。不待其渡江而西也。此豫之道也。夫梁亦有所受之也。古人於蒐狩。豫講武於井田。豫議察於東南。其處而溝澮互分者。豫禦暴於先公。後私者。豫作忠於相助。相友者。豫厚俗。直農事。已哉。梁之見。蓋得之此矣。大抵古人制一事。必默

寓一其制事之為用在目前而寓意之為用在日後目前者可見日後者不可見夫其不可得而見者乃其所以為豫者也

吾貴豫於社倉蓋此也

議三勸輸夫倉以社名則非獨有司之事也蓋所在居人均與有責焉傳曰未有上好仁而下不好義者也未有好義其事不終者也今吾邑

侯為吾邑賑荒計既肫肫若此矣豈鄉士大夫與居民有力者自為其桑梓身家計乃不能好義終

其真歟吾知其必不然蓋往見里中士大夫有饒於財者未有不結社飲酒以一日之樂糜小民終

歲之費也未有不窮奢治具集水陸之珍強客屬厭而客謝不能不止也未有不盛飾山池臺館魚

鳥花竹聲容耳目之玩而費累千金不惜也未有

不以其卑壤棄餘委諸無用而明以資盜陰以損福也諸如此類費何可勝計吾不敢謂諸君之盡然間亦有不免焉者倘稍裁百分一以輸之社廩備荒年賑濟而起人溝壑之中不過升斗中一粒

耳而遂能施仁義以行德化無用為有用諸君亦何憚不為此而忍負賢大夫此意也夫既名為士大夫讀書明道理當思天下饑由己饑顧乃於同室之困不少置念凶年饑歲家有餘貲廩有餘糧僮僕温飽而目覩鄉井餓夫枕藉溝壑者曾不少輦蹙其肩則亦與凡民何異於讀書明道理謂何此無論陰陽暗虧缺望難釋弟人皆有不忍人之

心豈以吾輩號士大夫反不能善推其心以為鄉間倡耶且條陳民間疾苦以請命於邑大夫亦吾輩責也今邑侯不待片言先自軫恤厯思善後之策欲使吾父老子弟長無凍餒吾輩有不感激踴躍相率首應者非夫也諸君必不爾也乃若環邑居民雖稱不腆然其間有力者不嘗有結社擡錢隨會講經為人所籠取乎不嘗有修寺建塔鑄佛塑神望南海走東岱跋涉道途足重繭不惜乎不嘗有齋僧飯道建醮設壇為遊食供糗糒而自謂修因果積福田乎夫此數者皆無益之事而為人

大夫倦倦焉。反趨起不前。此何以說也。夫神明正直。無可私媚。所福祐者。必是好人。既好人。必行好事。行好事。無大於濟人利物。濟人利物。無過於凶年饑歲。與人孟飯。可當斗粟。舉我一念。可活一人。故欲積陰德。行好事者。惟此時最得力。亦惟此時最省事。神明降鑒。惟此時最分明。亦惟此時最錫福。諸君如欲修今生與來世。為身家。為子孫。當無以逾此者。何故不為。而乃營營焉。役役焉。求之於泯昧窈冥之中。不見有分毫報應之益也。吾又為諸君大惑之。夫公輸苦浩繁。而社輸多寡隨意。公輸有程督。有稽覈。有罪繫。而社輸緩急自便。賠累無虞。且自積自備。雖為人。亦為己也。貧富何常。吾今以濟人。安知他日不有人濟我也。惟願士大夫與居民。有力者。謹承邑大夫教令。而道揚其波澤。以贊成盛舉。無忽。

議四

勸積。○以蓋藏論。一邑則邑人有富者。有貧者。有非貧非富。而衣食有餘者。大約不出此。

三等矣。貧者不能積。富者之輸穀備賑也。則以為貧人積。其非貧非富者。安積乎。積之家。則不免侈於用。而奪於姑。可已之費。將如何。而可蓋嘗見里中。小民有結社積錢者。或三五十文。或百文。貯之一所。及歲杪始出。而瓜分之。亦各如所輸數。夫其積而分。分如其所積。非有加多也。然不以存之家而為是紛紛者。誠恐其侈於用。而奪於姑。可已之費也。故為是以自制。而不厭其煩。此小民積錢之一策也。予欲推此意。以積粟於社。凡非貧非富。而衣食有餘者。凡輸粟一斗。儲社。更計歲輸一石。二斗。時愈久。積粟愈富。值荒歲。亦各如所輸之數。還歸之。如今之歲終分錢者。此亦小民積粟之一策也。不睹夫。撲滿乎。撲滿之為器。小器也。狀渾淪。惟一口。口僅可容一錢。滿積之。不能逾。二百。然可入不可出。必撲而毀之。而後可得用。吾今欲小民積粟於社者。蓋亦以社倉為撲滿。而取諸寄也。予始為社倉議成。復以其臆見。列為款。且曰。建置日積貯。日勸輸。日勸積。日無守。日約正。約副。日約。

會曰社神祈報曰賑濟日平糶凡十餘條其說頗具欲以備同志者採納已乃思人各有見予借借者爾而預設局方待俞跗盧扁循以己病得無涉美芹之議乎乃除去之第稍存梗概引起其端以待夫神聖工巧者之隨意製方也

萬曆庚子穀雨日沈龍江老人述

謹按社倉之法真厚風俗致太平之第一策也愚昔常創為悲智一社自施棺掩骸施藥施湯賑濟監粥外復本公此意欲勸同社之人力崇節儉務返真淳各里舉行社倉以為救荒杜患之本計惟得

神明上臺公祖父母勸諭於上鄉先達主持於下而又存里中仁人君子協謀共濟方可有成而人微言輕薄德寡助遂因循未果今錄其勸諭愚見於後以備採擇○昔耿壽自秦立常平封侯食報朱文公創置社倉利賴天下人人知為吉祥善事而卒莫之為者大抵貧者既自誘於貧而富者又恐暴揚其富以此因循而無真實

任事之人無真實建事之日也殊不知此事因果相關報應不爽常觀人平居無事惜金如命一旦遇疾病而醫藥之費不貲遇官司而獄訟之用無算遇水火盜賊而累世之積聚皆為烏有矣何如積德於冥冥獲報於昭昭之為得耶今有勸輸一法使貧富皆得以積善行仁為斯世勸焉○夫十室之邑必有忠信人之好善誰不如我但無人引誘之激發之耳故社倉之事以官督之而民不應以里胥督之而民不應即使應亦勉焉而已非心願也今各里推好善而公正者數人置簿一冊如募緣者於內開示社倉之功德如沈公及上所云者逐戶詢之願者入社不願者勿強雖肩挑步擔極貧窶者亦必須勸之蓋其人雖甚貧亦未必無善念也况所施不多倘遇饑荒彼必首先被賑是猶寄之外府耳其願者每月止勸輸銀二分計一年共出銀二錢四分人雖甚貧一月之中豈無銀二分可趨耶今以中小里分計之假如一里有四百

戶除頑梗不好善者。三分之一。可得三百家。而此三百家者。每月每戶。樂輸銀二分。積至一年。即可得銀七十二兩。王者每年。效雲棲誓神法。以洗心。隨以其銀。分寄本里典舖。或殷實之家。可朝呼而夕至者。薄起利。以生息之。或竟糶米。又併每年息銀計之。則雖小里。可得千金之米矣。一里如是。各里如是。則雖遇荒年。而蓄積有素。稽察分明。於是赤貧者。竟闕以賑之。中人之家。許其平糶。而殷實有力者。不與焉。蓋殷實者。尚有種種善事。當做。豈可奪饑人之食耶。然此特其大凡耳。其他徵收之法。賑散之法。不可拘於一轍。想樂善高賢。必有良法美意。出於尋常之外。使之盡善而無遺憾也。○至於鄉都。此法猶善。蓋不必歛銀。但履畝而勸。以輸米。當有無窮之利焉。假如每里約田千畝。每畝化人。出米五升。計一年。即可得米五十石。隨以五十石。借貸貧戶。責令加二起息。如朱子社倉法。則不出

十年。每里當有千石。備荒米在里。每里有此。誠為至計。其法備載文公崇安縣社倉記。宜做行之。○嘗見四鄉。每值青黃不接之時。貸本地富室米一石者。必加重利償之。一夫之力。所入幾何。宿逋既。要填還。新逋又難遲緩。以致日瘠日貧。流為頑鈍。無賴而田主亦陰受其弊矣。如社倉之法。行。則有無相通。不至重困。顧其法斷須照田出米。而田大都半屬鄉紳。太戶。完租之日。豈能重起科條。勸其輸納。今懇仁人君子。大施德義之舉。各就租田之里。勸彼力行。此法。其每畝應輸之米。即於每畝租內扣除。少寬其力。以為社倉之本。至於積散之法。仍聽本里耆老公正諸人。自操其權。而不從中掣肘。則事無不就矣。俗語有云。好田不如好佃。使彼稍可謀生。租入自無拖欠。行之十年。本米既多。利米又足。永無饑饉之虞。真得藏富於民之良法。而陰功所積。將子孫亦世被其餘蔭矣。在瞽之言。幸惟垂鑒。

文嘉再識



朱子社倉法附 宋乾道間朱子居建寧府崇安縣之開耀鄉時大饑與進士劉如愚勸民發粟減直賑濟里人獲存俄而盜發浦城人情大震藏粟亦且竭以書請於知府徐公貸粟六百斛餓民以次受粟遂無饑亂歡聲動旁邑及秋王公准來代守適有年民願以粟償官王公曰歲凶穰不常其留粟里中而上其籍於府倘後艱食可無前運之勞遂立法歲一欽散收息什二即不欲者勿強歲少饑則弛半息大饑則盡蠲之著為例又以粟分貯民家於守視出納不便乃捐一年之息為倉三間以貯之十有四年將原米六百石還府其見管二千一百石則累年所息也申本府照會永不收息每石只收耗米三升以此一鄉五十里內雖遇凶年人不闕食又奏請以其法推廣行之天下今隨地擇人隨鄉立約申官遵守實為久遠之利上布其法於諸路遠近賴之○按宋張詠鎮蜀時夢謁紫府真君接語未久吏忽報請到西門黃兼濟黃幅巾道服真君降階迎接甚謹揖黃坐詠之上詢

故詳欵似有欽嘆之意詠翌日問吏曰西門有黃兼濟否曰有之命召之戒令常服來比至一如夢中所見遂以夢告因問有何陰德蒙真君禮遇如此黃曰初無善事惟黍麥熟時以錢三百緡收糶至明年禾黍未熟小民艱食之時糶之一樣價值一般升斗在我初無所損而小民得濟危急詠曰此公所以坐某上也令吏挾坐索公裳拜之後黃以壽考終子孫多貴顯者應氏曰此即古常平社倉遺意也百千億宰官身有民責方能活人者往往不能舉行而黃公以匹夫為之神人欽德安在介之士不足濟人也昔伏湛當更始時為平原守倉卒兵亂海內紛耗諭妻子曰天下皆饑奈何獨飽乃共食麤糲悉出所有周其鄉里蘇老泉父名果嘗好施鬻產破其家幾致貧困蓋士當其急仁時殺其軀而有益計尤且為之况在我無損而於人有濟如前說云云亦何憚而不為耶為善莫大於救人救人莫急於凶歲予是以類記之○倘平日未有所備猝遇饑荒宜行里賑或粥担之法

附各里分賑法 先立主賑二人。編募里中紳士素封。捐貲糶米。家詢戶稽。分極貧次貧二等。極貧者。日米八合。父母同之。妻子減半。次貧者。各減半。先一日計口。注票。親付其家。次晨集某處。給十日米。每月三次。以濟粥。及春夏。豆麥收穫。生理漸行。則小民復可鼓腹而嬉。地方亦得安枕而臥矣。○崇禎辛巳春。浙大饑。吾杭各里行此法。而各上臺。又設粥廠八處。以食饑民。全活甚眾。附濟饑粥擔法。歲值饑荒。流殍載道。嗚呼待哺者。日千萬計。駢肩累足。沴氣薰蒸。疫癘不免。恐更有意外之虞。各宜競發慈心。施行粥擔之事。或一家獨行。或各姓共舉。其法。每用白米五六升。煮粥。取有蓋水桶。外備小籃。實以鹽菜。碗十隻。筋十雙。挑擔至通衢。或郊外。凡遇貧者。令其列坐。人給一餐。食畢。即借附近人家。盆水滌器。以便後食者。約每擔可食五六十人。十擔便足。食五六百人。得逐里逐巷。每日有仁人長者。鼓舞激勸。齊心共舉。則雖千萬垂斃之民。便可暫延身命。謹按此法。無設

廠聚人之弊。有施粥法。人之實。既可時止。時行。抑且無功。無名。勉力而行。隨人能濟眾。每日有仁方矣。是真現在浩大陰功。切勿因循。當面蹉過。按荒年更有外具衣冠。內多饑餒。不能含羞就食者。如托人。餅鉢取食。勿生阻厭。倘訪知真正赤貧。無人可免者。更宜挑擔上門。量口給食。○又四鄉窮民。流離顛沛。尤為可憫。每鎮每村。稍可足食者。互相勉力。速行。勿使流移。他所功德。更倍如四月後。天災不可用粥。復有一法。不拘糶米。麥。豆。磨粉。為蒸餅湯團之類。照散粥法。分給。甚便。附許真君濟世仙方。黃豆七斗。芝麻三斗。水淘過。即蒸。不可浸多。時恐去元氣。蒸過。即晒。晒乾。去殼。再蒸。三蒸三晒。搗為丸。如核桃大。每服一丸。可以不饑。○不餓丸。芝麻糯米。各三升。紅棗三斤。去核。炒燥。磨末。煉蜜丸。如彈子大。每服一丸。湯水皆可下。康熙辛亥。於吳郡賑饑。曾製用。但紅棗不炒。惟搗丸。○戚少保千金麵方。白麵六斤。茯苓四兩。甘草二兩。乾薑二兩。三味焙燥。磨末。蜜一斤。菜油二

斤生薑四兩搗泔右和成塊切片甑內蒸熟陰乾  
 春末每服一小杯白滾湯淡鹽湯皆可調服最能  
 耐饑其麵絹袋盛之可留經久○濟生大丹尚氏  
 永年堂施驗芝蔴一斗微炒磨黃豆糯米各一斗  
 二味水淘蒸熟晒乾或燥熟地黃十斤黃芪炙  
 山藥各五斤白朮三斤右為末紅棗十斤煮熟去  
 皮核搗爛配入煉蜜搗和每丸約五錢白湯服修  
 合如法香美療饑即數月可安○疑神辟穢丹凡  
 人蚤起或冷暖不時或食油膩或聞穢氣多有嘔  
 吐腹痛瀉泄等症主方白朮壁土炒蒼朮米泔浸  
 干宿刮去皮陳皮厚朴薑汁炒各三兩甘草白朮  
 藜炒黃去刺丹參各一兩五錢為末煉蜜丸龍眼  
 大口噙化或淡薑湯調服感胃風寒暑濕痺疾並  
 治考場製惠同人年荒預防時疫此丹神效蓋考  
 場補劑居多設具寒暑反累不如此藥平和又能  
 兼治百病天暑凉水可用冬寒熱酒可服一切出  
 行不可不備○廣濟丹昔崇禎庚辰辛巳浙省奇  
 荒開前輩鄉先生有用凝神辟穢丹方加老黃米

三升淘淨候乾炒香磨粉丸服一時全活無算因  
 名廣濟蓋人經饑餓胃氣虛餒兼感汗穢或遭病  
 纏服此既可充饑又能療病穀食之功更能保全  
 廣大○以上四方設遇絕粒皆足備急一時後二  
 方能治諸病預製施送為德甚普  
 附避難小兒啼法綿為小毬隨兒大小為之以  
 甘草煎濃汁或熟棗膏浸過有甜味者隨身帶之  
 臨時以唾津潤透置兒口中過則去之右法見  
 丘瓊山二賢抄方係靖康年間有神人書於通衢救護嬰兒甚眾

勸施迂談

飽主人左薦珍無已強之大嚼予蹙然舉筋不能  
 下而貧人有終身不知肉味者有饑餓死者吾冬  
 裘夏葛涼燠以時猶欲盛統綺狗時尚冗陳疊積  
 多不可遍及身而貧人有衣不蔽體傍簷露宿朔  
 風刺骨寒顛齒擊者吾高簷六椽安居甚適猶復  
 為山池臺館魚鳥花竹聲容耳目之玩或有一奇

異。則不惜千金以求之。而貧人緩急無賴。至有捐性命。割父子。絕夫婦之歡者。吾為身家子孫計。已寬然有餘。猶務日闢疆。展土多積。厚蓄為百千年。虞代匱而貧人有室如懸磬。朝不謀夕者。吾財貨紛紛。而耳目不及。周精神不及。運不免。至狼戾縱橫。陰以潤盜賊。囊橐而貧人偶拾其一。遺乘釋穗。則忍不能予。或負貸子錢。通工易事。則刀錐之末。有盡爭之者。吾盛陳筐篚。攀豪貴。惟恐不納。而貧人丐一錢之施。延旦夕之命。有艱然作色者。有託在肺腑之親。而不能以貧身歸者。吾多財而招尤。取忌。宜後導淫。因之賈禍。而貧人有待吾鼠壤之餘。以俸為福利。而不可得者。何世事之參差不齊。一至於此也。吾睹而悲焉。乃欲為貧人緩頰。勸富人行其德。非槩以古人高義。如麥舟助喪。傾貲賑饑之類。強人所難。惟捐其所無用。以化而為有用。則無不可為者。請即以前事較度之。賓筵苦醉飽不堪。則何不樽盃盂一二。以施之。餓而欲死者。使足於半菽。可生也。何不以殘杯冷汁。施之於生卒。

不知肉味者。使其知人間之有此味也。為兩得其便乎。然挹彼注此耳。實非有他費也。衣不可勝用。而敝之篋笥。與無衣同。省一二為短褐。以施於衣不蔽體者。則人且挾纊。吾文繡亦自不乏也。吾不為一時耳目之玩。即可全人之性命。與人之骨肉。此高世義舉也。以施於談議。則可傳。以資於深夜。則自得。吾以為為天下之可玩好者。無佳於此矣。夫豈必山池臺館。魚鳥花竹之類。而後為快乎。吾多積厚蓄。貫朽粟陳。終吾身不盡用。以遺諸子孫。則賢者不恃此足用。愚者雖得此不為用。將遺之。不知名何人乎。亦卒歸無用也。吾所委。很戾縱橫者。業不謀夕者。之猶為有用也。吾所遺。於道也。非損吾已。實度外。苟貧人得有之。是拾遺於道也。非損吾室中之有也。吾何惜。吾盛陳筐篚。攀機豪貴。寧記見德。施斗升於涸轍。即欣欣起死回生也。何以不為此。而為彼。吾多財而為祟。彼得少而為福。而吾損有餘。補不足。雖為人詒福。實為我脫禍也。此兩利之道也。徒蓄膏自煎。何吾故曰。化無用為有用。

者蓋此也不當睹天道人事乎夫盈虛消長之運  
 天且弗違泉貨流行之物豈居一處吾不暇遠引  
 為喻即吾井里中昔所稱富人之家何可勝數也  
 今存者幾乎此疆彼界封域靡常王謝故宅迭更  
 幾姓彼其子孫之不能終享也非盡由前人之好  
 施而不為遠圖也盛衰倚伏勢不得不然也知其  
 然而上以承天意下以順人情當積則積當散則  
 散其來不固其去不慳可為己用亦可為人用者  
 達人也既以籠天下之泉貨而聚之一隅又設之  
 隄防壘狀之以為己千世世不板之業使不得他  
 有灌輸者愚人也積陰德為長久之計者知人也  
 無所為而為者君子也

垂涕哀言

示諸子姓防未然也○吾家子弟二十十年  
 前尚不能皆有衣冠榮身有良田美宅資財足用出門  
 乃人人有衣冠榮身有良田美宅資財足用出門  
 有車馬僕從從者至彼此不能相識可謂極盛雖  
 諸子自能運用豈不亦祖宗陰德神明扶持積  
 仁累善餘慶所貽乎實不勝私喜私幸顧又惟極

盛難繼持滿易傾天道乘除數有一定而作善降  
 祥作惡降殃人事感兆理尤不爽故善享福者不  
 必更得龍望蜀營營無厭只宜效履薄臨深兢兢  
 自保其尚須以手捫心默自思念吾昔茅茨而今  
 大廈吾昔僅一夫之田而今連數井之壤吾昔猶  
 奔是衣食而今則安享富貴吾分已踰吾又何求  
 吾自今惟知止知足守禮守法以上培先德下啓  
 後人即神祐可延家聲不墜斯以退為進以少致  
 多之妙術也若猶復貪得未已競進不休居已侈  
 而猶恢田已多而務廣強之嚮不出其本心與之  
 直不合乎公道或逼債以傾人之產或牽牛以蹊  
 人之田或縱牙爪於通衢或逞報復於私忿諸如  
 此類猶自多端總之我漁利下人亦乘機以規利  
 我行惡下人皆借勢以助惡乃遂使孤獨鰥寡忍  
 氣吞聲道路里隣旁觀側目顧猶且揚揚得意見  
 謂豪強兀兀勞心自矜謀畧夫豈知  
 神目如電法網不疎巷議在前吏議隨後惡名一潰  
 欲洗難除衆指交加不催自仆當斯之際惇入者

不免悖出多藏者亦復厚亡。室雖廣而不得寧居。田雖多而不能安享。身既窘迫。尤累及妻。辱名已。侈辱復玷及祖父。欲益反損。欲進反卻。得乎失乎。利乎害乎。覆轍在途。殷鑒不遠。雖至愚人。知為左計矣。獨奈何。惡濕而居下。安危而利。災耶。吾懷此數年。久欲相告。祇緣昔日猶忝仕途。竊意諸兒。妄相忖度。必謂愛護功名。恐貽連累。故為此激切。議論。使自矜持。且將不信。不從。徒以自嗟自嘆。今年已七旬。更有何意。老來一得。豈是空談。惟骨肉關係。宗祏繫念。或誤及於陷穽。因明示以周行。而苦口發藥。逆耳進規。有如此者。夫杞人即過計。何妨。越人相坐視。則忍矣。孟子曰。其兄關弓。而射之。則已垂涕泣。而道之。無他。戚之也。豈謂予哉。七十歲龍江老人書。

卷上終



